

**Date – 02/12/2025**

**Time - 18:30 -18:40Hrs**

**AKASHVANI AIZAWL  
REGIONAL NEWS BULLETIN**

**HEADLINES ( EVENING )**

1. Naktuk a Lai Autonomous District Council Inthlanpui vote thlak turin ruahmanna peihfel a ni tawh.
2. "Raj Bhavan, Mizoram" chu "Lok Bhavan, Mizoram" ti a thlak a ni.
3. Union Agriculture Minister Shivraj Singh Chauhan chuan MGNREGS atan sawrkarin cheng vaibelchhe sing 6 sang 8 za thum 93 leh point 67 a State leh UT te hnenah kum 2025-26 sawrkar kum chhungin a pe chhuak tawh
4. Parliament chuan vawiin khan Manipur Goods and Services Tax (Second Amendment) Bill,2025 a pass.

<><><>

**LADC READY FOR POLLS**

Naktuk a Lai Autonomous District Council Inthlanpui vote thlak turin ruahmanna peihfel a ni tawh a, vawiin khan Lawngtlai khawpui leh a chhehvel a Inthlanna buaipuitu tur Polling Party ten an duty na tur hmun an pan.

Polling Station 111 awmna LADC ah hmun hla zawka Duty tur Polling Party 59 te chuan nimin khan an duty na tur hmun an pan tawh a, vawiin khan hmun hnai zawka duty tur Polling Party 52 ten an duty na tur hmun Lawngtlai DC Office tual atanga panin District Election Officer Pu Donny Lalruatsanga'n thataka an tihtur hlen tura duhsakna hlan chhungin a thlahliam.

Inthlanna buaipuitute hian vawiin khan mipui lamin him leh boruak nuamtak hnuaia Vote an thlak theih nan Vote thlakna tura ruahmanah te Vote thlakna tur an tifel a, Inthlanpui ah hian Electronic Voting Machine hmantur niin, naktuk zing dar 7 atangin mipui ten an aiawha LADC a roreltur thlangin Vote an thlak tan ang.

Bial 25 awmna LADC ah Candidate 80 awmin, ZPM chuan bial awm zawng zawng bial 25 an chuhkim a, MNF in bial 20 ah Candidate neiin, Congress in bial 14

ah Candidate an nei a, BJP in bial 10 Candidate neiin Independent a chuh mi 11 an awm bawk.

<><><>

## MUHCS

Mizoram sorkar chuan Mizoram Universal Healthcare Scheme (MUHCS) hmangtu damlote enkawlina senso atan MUHCS kalpuitu damdawi-inte hnenah damlo an enkawlina bill cheng nuai 8,405 a pe tawh.

Mizoram State Healthcare Society (MSHCS) atanga Akashvani News Aizawl thudawn danin, kumin April thlaa MUHCS kalpui a nih atanga thla liamta November 28 thleng khan MUHCS kalpuitu damdawi-inte hnenah damlo enkawlina senso an pe tawh a, bill an pek tawh zawng zawng hi a vaiin cheng nuai 8,405 niin, heng hi MUHCS kalpuina damdawi-in hrang hranga damlo 54,261-te enkawlina bill a ni. Naktukah hian MSHCS hian damdawi-inte hnenah damlo enkawlina bill pek leh an tum a, an buaipui mek a ni.

Mizoram chhungah MUHCS kalpuitu empanelled private hospital 13 leh empanelled private day care centre pathum a awm a, Mizoram pawnah empanelled hospital 25 leh deemed empanelled hospital 13 a awm mek bakah, Mizoram chhunga sorkar damdawi-in zawng zawngah MUHCS hi hman a ni bawk.

Kumin July thla khan damlo 10,652 bill atan MUHCS kalpuitu damdawi-inte hnenah cheng nuai 1,496 pek niin a tam ber thla a ni a; April thla khan damlo bill 1,548 atan cheng nuai 109 pek niin a tlem ber tum a ni.

*MUHCS-ah hian kum 2025-26 atan sorkar hnathawk chhungkaw 36,324, civil pensioner chhungkaw 8,733 leh AB PM-JAY golden card nei chhungkaw 2,20,463 leh a hranpaa pawisa chawia inziak lut (contributory) chhungkaw 20,136 an awm a; CSS leh grant-in-aid (GIA) hnuaia thawk inziak lut zat erawh hriat theih a la ni lo.*

<><><>

## RAJ BHAVAN

"Raj Bhavan, Mizoram" chu "Lok Bhavan, Mizoram" ti a thlak a ni a,

Sawrkar laipui Ministry of Home Affairs atanga a hriattirna lehkha hmuh bawhzuina leh Mizoram Larsap thupek angin Tun atang chuan Mizoram Larsap chenna chu "Raj Bhavan, Mizoram" ti tawh lovin "Lok Bhavan, Mizoram" tih tawh tur a ni.

<><><>

## **AKASHVANI-RIMAWI KUTPUI**

Akashvani Aizawl buatsaih Rimawi Kutpui vawiina Aizawl Tuikhuahtlanga Akashvani Conference Hall-a hman ah Akashvani Aizawl Director leh Mizoram Cluster Head Pu DR Lalropuia'n Akashvani Aizawl ah Visual Radio System bun thuai tum ani a ti.

Rimawi Kutpui - Winter Wonderland hi kumin Krismas lo thleng tur inpuahchahna puala Akashvani Aizawl-a thawktute rimawi hmanga intihlimna atana buatsaih a ni a, Director Pu DR Lalropuia chuan Visual Radio System bun turin kawng hrang hranga hmalak ani a ti a, studio ti changtlung zual tur leh camera bakah khawl tam tak ken tel a neih dawn avangin tih changtlun ngai tam tak a awm tih sawiin peih fel thuai tura hmalak mek a nih thu a sawi.

Pu DR Lalropuia chuan hla chu mihring rilru leh ngaihnan thlak theihna kawng pawimawh tak ani a ti a, tunlai khawvela midang ngaihsakna a tlem tawhna ah hla chu midangte dinhmun hrethiamtu leh harsatna an tawh changa in awm tleina ber anih avangin Rimawi Kutpui chu a pawimawh hle a ti a, mi tam zawkin rimawi an hlut leh zual theih nan Radio thawktute tan la turin a sawm a ni.

Vawiina Rimawi Kutpuiah hian zai leh lam bakah intihlimna hrang hranga hun hman a ni a, Tun dinhmunah Akashvani Aizawl ah hian thawktu mi 170 an awm mek a, a ngheta thawk mi 50 leh a nghetlo a thawk mi 120 an awm mek a ni.



## **HR SEC SCHOOL GAMES**

School Education Department buatsaihin Mizoram Higher Secondary School Games vawi 22 –na chu vawiin atang khan Aizawlah tan a ni a, zirtawpni thleng a awh ang.

Tun tum Higher Secondary School Games-ah hian Sports Discipline hrang hrang 7-Athletics, Football, Volleyball, Taekwondo, inkawibah, kalchhet leh inhrupawh-ahte zirlaite an inel a, discipline hrang hrang hi hmun hrang hrangah nghah a ni a. Aizawl pawn atangin Higher Secondary school 16 leh Aizawl chhung atangin Higher Secondary School 12 an tel a, zirlai 1500 vel leh zirtirtu 200 vel an tel a ni.



## **JEEVAN RAKSHA PADHAK**

Ramchunga mi huaisen chawimawina 'Jeevan Raksha Padak Award 2025' dawngtu, Pu Lalanzova, Tlangsam khua vawiin khan chu Home Minister Pu K. Sapdanga lawmman leh chawimawina a Office Chamber ah a hlan a, he Award hian chawimawina tangkapui, citation leh pawisa fai cheng nuai 1 a keng a ni.

Jeeven Raksha Padak Award hi chhiatna leh chetsualna kara huaisen taka mi nunna chhanchhuaktute hnena hlan thin niin he chawimawina hi mi huaisen bikte dawn thin a ni a; Pu Lalanzova hian kum 2024 September ni 7 khan Khawzawl District, Dulte khawdai, Dilmawiah tui tla an awm tih a hriat veleh tui tla chhan nan tuiah a zuang lut ve nghal a; Dilmawi hi feet 50 zet a thuk niin, theihtawpa a beih hnuah tui tla hi la chhuakin, a nunna a chhanhim a ni. He a thiltih ropui tak avang leh mi nunna hlu tak a chhanchhuah avang hian Jeevan Raksha Padak Award 2025 dawng tura thlanchhuah niin vawiin December 2, 2025 (Thawhlejni) hian chawimawina hi hlan a ni ta a ni.

<><><>

## **CIJW SCHOOL**

Vawiin khan Vairengte CIJW School Commandant thar Maj. Gen. Kulvir Singh chuan Kolasib DC pisa tlawh in, DC leh mi pawimawh dangte nen an inkawm.

Vairengtea Counter Insurgency & Jungle Warfare School (CIJW School) hotu Commandant thar puala inkawmna hun kaihruihu Kolasib DC Pu Robert C. Lalhmangaiha chuan thutawi sawiin, Kolasib District chhunga sorkar department hrang hrang hotute leh CIJW School hotuten thawhhona tha tak neih zel a pawimawh thu sawiin, sorkar hmalakna kawng hrang hrangah thawhhona tha tak nei chhonzawm zel turin a sawm a, Commandant chu a hnathawhna ah duhsakna a hlan nghal bawk.

He hunah hian Maj. Gen. Kulvir Singh chuan, CIJW School, Vairengte chu sipai training na hmunpui a nih avangin khawvel hmun hrang hrang atangin sipai training turin an pan thin thu a sawi a, an hnathawhna ah mipui te tana tangkaina an nei ve thei anih chuan theihtawp a puih an in huam reng thu sawi in, District Administration nen pawh thawhhona tha tak neih zel chu pawimawh a tih thu a sawi bawk. Commandant chuan ESM Welfare chungchang te, Sainik Aramghar te leh ZSB office chungchangte pawh a sawi bawk.

DC hova inkawmhona ah hian Kolasiba sorkar department hotu thenkhat te, CIJW School hotute leh Kolasiba Media lama thawktute an tel ani.

<><><>

## **AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## **NO TOLERANCE DRIVE**

Ngaihnamna tel lova lirthei endik runpui, No tolerance drive chu nimir atang khan Aizawlah kalpui a ni a, lirthei dan bawhchhia 119 man a ni.

No tolerance drive hi Treasury Square-a Dak Inpui bulah leh Civil Hospital Aizawl peng bulah neih a ni a, hetah hian lirtheite chu lehkhaw pawimawh an neih kim leh kim loh endik a ni a. Nimir bikah hian lirthei 333 endik atangin dan bawhchhia 119 man an ni a, an zinga 91 chu a hmuna pawisa chawi tir nghal an ni a, midang 29 chu an Document hren sak an ni.

Dan bawhchhia zingah hian Insurane fel lo an tam ber a, Driving License nei lo-a lirthei khalh pawh an awm nual a, Pollution Certificate nei lo chu an awm mang lo a, mi 91 te sum chawi tlingkhawm chu cheng nuai 1, sing 2 leh 500 a tling a ni.



## **MNREGS**

Union Agriculture Minister Shivraj Singh Chauhan chuan Mahatma Gandhi National Rural Employment Guarantee Scheme (MGNREGS) atan sawrkarin cheng vaibelchhe sing 6 sang 8 za thum 93 leh point 67 a State leh UT te hnenah kum 2025-26 sawrkar kum chhungin a pe chhuak tawh. Lok Sabha-a ziaka zawhna chhangin Union Minister chuan cheng vaibelchhe 57853.62 chu hlawh atan pek tawh niin cheng vaibelchhe 10540.05 chu Material leh administration atan pek tawh a ni a ti a. He scheme hnuaiah hian sarwkar chuan beneficiary te hnenah direct benefit transfer hmangin an account ah hlawh a thun tih a sawi a ni.



## **PARLIAMENT**

Parliament chuan vawirin khan Manipur Goods and Services Tax (Second Amendment) Bill,2025 a pass. He bill hi Lok Sabha-a pass anih hnuaiah vawirin khan Rajya Sabha ah sawiho niin Lok Sabha ah thawn let leh a ni a. He bill hian Manipur Goods and Services Tax Act,2017 a siam tha dawn a. Manipur Goods and Services Tax (Second Amendment) Ordinance,2025 a thlak dawn a ni.

Hetihlai hian vawirin Parliament rorel inkhawm hi opposition membarten rorel hleithei lovin an siam a. Special Intensive Revision of Electoral Roll chungchang an sawisel bakah thil phut dang hrang hrang avagnin rorel hleithei lovin house a awm a. Vawirin atan rorel inkhawm hi tihawp chhonzawm a ni.

